



PORTAVÓS

VI GOVERN U KONSTITUSIONÁL



KOMUNIKADU BA MEDIA

Dili, loron 20 fulan-fevereiru tinan 2017

Governu garante katak preparasaun ba eleisaun sira la'õ di'ak

Governu, luhusi Komisaun Nasionál Eleisaun – CNE (sigla iha lian portugés), Sekretariadu Tékniku Administrasaun Eleitoral – STAE, husi Ministériu Administrasaun Estatál no Ministériu Interiõr, hala'õ hela preparativu tomak ne'ebé presiza ba eleisaun prezidensiál oinmai, ne'ebé sei hala'õ iha loron 20 fulan-marsu tinan 2017.

Iha loron 15 fulan-fevereiru, [STAE fó sai naran kandidatu sira](#) ba eleisaun prezidensiál, ne'ebé hetan ona validasaun husi Tribunál Rekursu. Kandidatu sira ne'e hili-belek (elejivel) hotu. Sira ne'e maka: Amarin Vieira, António da Conceição, António Maher Lopes, Francisco Guterres Lu-Olo, José António de Jesus Neves, José Luís Guterres, Luís Alves Tilman no Maria Ângela Freitas da Silva.

Dezempeñu di'ak iha prosesu eleitoral sira no pluralizmu iha Timor-Leste hetan rekoñesimentu internasionál, liu-liu iha [Índise Demokrasia nian iha tinan 2016](#) ne'ebé fó-sai foin daudaun ne'e, iha ne'ebé kontribui atu país ne'e bele hetan klasifikasaun iha fatin da-1 iha tabela kona-ba moris iha demokrasia nia laran iha Sudezta Aziátiku, iha fatin da-5 iha Ázia no iha fatin da-43 entre Estadu sira hotu ne'ebé hetan avaliasaun. [Eleisaun lokál sira](#) ikus ne'ebé hala'õ iha país laran tomak iha fulan-outubru no fulan-novembru tinan liubá, la'õ ho hakmatek no tuir orden.

Hanesan ho iha tinan liubá, observadór eleitoral sira husi estranjeiru sei mai fila-fali, atu akompañia períodu eleitoral sira tinan ne'e nian. Delegasaun [Uniaun Europeia \(UE\)](#) ninia xefe misaun maka Bilbao Barindica, ne'ebé dehan ona katak ba nia sai hanesan "onra ida atu lidera Misaun Observasaun Eleitoral UE nian ba Timor-Leste" no nia fiar-metin katak "parte interesada hotu sei kontribui atu asegura eleisaun sira oinmai no sei konsolida liután istoriál país nian kona-ba eleisaun sira ne'ebé maka la'õ di'ak, kredivel no pasifika".

Planu seguransa nian sira ba períodu eleitoral daudaun ne'e iha hela koordenasau nia laran tuir Konseitu Estratéjiku Defeza no Seguransa nian, ne'ebé [hetan aprovasaun](#) iha tinan liubá husi Governu, ne'ebé rezulta husi prosesu konsulta ida ne'ebé luan ho parte interesada sira, atubele hetan konsensu ida. Dokumentu ida ne'e buka atu "asegura liberdade, seguransa populasau nian no ezersiu husi sira-nia direitu no liberdade fundamentál sira, pás públika, protesaun ba ninia beins no ba patrimóniu nasional", ne'ebé maka sai hanesan Objetivu Estratéjiku sira husi Defeza no Seguransa Nasionál.

Portavós, Ministru Estadu Agio Pereira, hateten katak "preparativu sira ba eleisaun sira la'õ daudaun iha dalan ne'ebé loos no ita fiar katak ita-nia país nia reputasaun atu kondús eleisaun sira ne'ebé livre, justa no organiza ho di'ak, iha ambiente ida pás no hakmatek nian, sei forte liután". **REMATA**



Agio Pereira

+670 7723 0011

agio.pereira@cdm.gov.tl

govtlmedia@gmail.com

www.timor-leste.gov.tl